

三怡堂叢書

妙遠堂詩鈔

三九

南陽先民集

妙遠堂詩鈔

睢陽蔣藩署



庚午冬十月
陶然齋開雕

南陽先生集

妙遠堂詩集序

新野仲良馬公蓋予之外大父行也新野距吾鄧五十里而羸冠蓋甲第相望公方弱冠偕兄宗伯公登甲科跂足制作庭然卒不獲館選一官躑躅旋起旋仆於當世既少所可益伉爽自負視館閣諸君率葫蘆依依甚者椽窗告矣用相訾警曰課量聲詩盤礴山阿佛窟間酒旗歌板一寫其宥徃流連之致當是時竟陵鍾伯敬張一軍向之耳食於濟南瑯琊者轉而趨其約束公同年相友善顧齟齬不相下伯敬陽推尊之實遠之也公英分臆發得名又蚤於前人所謂蒼樓古淡或尙有符錢虞山論次列朝詩謂

其學古未純良然至謂其少年盛氣腸肥腦滿少師友鑱
厲之功未爲篤論予縱覽全集知妙遠二字是其真諦寫
難狀之景摻無窮之變於他人鏤心擢肝而弗獲者一經
拈出如荷葉珠如松針露如曳雲之無定姿人人意中作
一微妙觀雖曰夙生趨詣實亦慘費經營矣當時海內簪
衽之流互相提唱裴徊惋惜至有假年之歎詎不信然顧
先生雖年不及四十未躋華要而風流照灼騰華茂實頃
篋之間爵秩雖有崇卑聲施實相伯仲視古來文人薄命
如王子安之早赴汨羅盧仝華之惻愴病梨修短榮悴相
去孰多往者寇躪中州典籍放失獨所謂妙遠堂者板雖

無存尙有印本藏之遺老敗壁間不隨虐燄俱灰今猶得
就此巋然僅存者爲之摹刻以傳是公之精英不沒長存
於天壤間榮名爲寶雖千百者艾無以易茲矣康熙四十
八年夏四月愚孫婿彭始搏直上書於嘉禾官舍

Blank manuscript page with vertical columns.

妙遠堂詩鈔卷之一

新野馬之駿仲良撰 孫壻彭始搏直上重校刻

公集凡刻兩次其分類者係妻祖宗伯公於公歿後總前後集而刻之金陵世所傳妙遠堂全集是也外舅雲孫公自江南携歸燬於流寇之亂所存一二抄本得之友人故簾敗壁閒頗疑其前後叅錯不及分年之集猶可見當時情事始末蓋係公所自訂前有先宗伯公序然亦缺落不全矣壬午在京師偶於漁洋先生案頭見之未及全錄止就分編之目次彙而抄之以歸戊子冬嘉禾重校照此編輯其間或有無可考證者妄自揣度

斟酌而次序之其桐雨齋至緣吹齋係京師及于役吳
闕作自且軒以訖於畸草係遷謫休里門及別駕陪京
時後四種公有小序今貫於各編之首苦餘草係讀禮
時所成惜未得其全因以甲子赴都諸作附之於後

桐雨齋草

春日遊陳氏園與荆伯鶚張伯寅徐象一梁有實傅

仲綸同賦

但覺郊原濶仍看物態殊漲烟松欲暝欹雨竹難扶覆射
矜頻中觴飛督偶逋不愁供卧簟先慮竭行厨
睡蝶攀枝見殘鶯逐樹聽花沾晴露白林立晚陰青茶氣

衝簾起歌聲近水停野鷗隨去住與我共忘形

閏三月同丘毛伯鍾伯敬韓求仲沈士範宋獻儒胡
仲修王曰常家時良集米仲詔湛園和伯敬韻

良朋雖偶約幽事却從人樹影留殘晝禽言變晚春石將
邀客拜花欲誤漁津纔與輪蹄隔堪驚物外身

夏日同鍾伯敬湯去執遊西山出西直門道中作

看山在城中可想不可有車馬促朝叅看山亦難久杖策
誠非艱胡爲日摧首我志在勇往况携同心友逶迤越重
圍蒼翠忽如揉活活溪韻長靡靡樹陰厚藍筍灑松風快
此褰帷受禮壇穿層花踐杙憇高柳造境豈必溪會心在

所取

廻龍潭

倒景有意好溪路無人幽三人踞三石聲影隨波流天宇
澹可拾風文輕旋收仰怯飛羽墮俯玩修鱗遊忘言騁遐
矚林溼青悠悠

金山寺月

疎鐘警空壑蛙鬧不知喧行觸樹藤坐留橋石温閒拈
方外事共作丘中言忽報過溪虎山僧催閉門

香山寺

割翠開雙戶流丹架百層路高行漸濕雲鎖石難崩池影

魚遊樹巖聲鼠竄藤澗風排霧出海日帶霞升鹿下時驚
客獺馴嬾避僧西方支許社端不悵無朋

送湯去執入洛應鞏令程之聘

旅病勞行役耕漁違野心遊爲貧所就恨與別相尋吟對
夏雲變夢歸秋水澗臨邛恭不謬翻覺礙援琴

送史言爲令會稽

史陽
羨人

里居山水最菰蒲綠綬專城復勝區沙月薄迎雙槩動江
潮涼送一琴孤援書古穴饒科斗酌酒荒臺祇鷓鴣魚筍
高齋堪自飽甑塵無用學萊蕪

繡佛歌爲王長卿內子作

王郎手持一疋絹香氣淋漓隔紙見展之使我起敬心普
陀大士開生面細玩總非綵繪成閨人纂組通神明合掌
低眉各極趣衣摺鬢雲不知數望去真疑瞻寶月捫來直
似籠輕霧筆墨寧惟失勝場純絲兼亦無鍼路王郎字學
陰符經令子復解施丹青先掃白地具勾畫素腕纔經滅
形跡谿逕已脫骨力存君家雅事何其懿乃知絕技古今
有爾時非心亦非手前身自是天人師億萬化身一掌取
更聞慧性能護持纖塵不肯沾輕絲三秋僅僅成二幅雨
溼風昏輒置之晚窻倦指焚香坐想見王郎頂禮時

十方菴和伯敬韻

何處堪消暑非山則水鄉樹深渾欲暝花近反無香心靜
鳴蟬裏身閒浴鷺傍娟娟時映浦采采未褰裳欲晚波難
綠迎秋木漸蒼市譁原未遠烟景乃微茫

送劉生還里時劉有長兄之變

對爾鄉愁積何當復送歸砌寒蛩首默沙淺雁何依暫別
家多難微名計屢違帝城秋月好惆悵各清輝
每憶同來日難爲獨往心村炊初稻粒野望欲楓林歡想
秦嘉鏡悲憐子敬琴尊鱸子有思早晚或相尋

八月十四夜集焦園

忍負三秋色堪先一夕期露滋苔影重日薄樹文敬絃管

幽相借池臺野任為去留憑醉準非為月能遲

折柳悲樓邃驚梧近井牀人如坐空水樹欲警微霜砧杵
同千戶關山自一方飛鳥疑厭客驚斷不成行

卓錫泉亭

石洞何年闢孤筇此日經樹當懸壁翠竹過曲池青古蔓
高於屋新荷細若萍相看理吟嘯猿鳥驟來聽

此首原在香山寺排

律之下

送龍君御備兵湟中

長劍危旌指壯遊豈論骨法應封侯葡萄榨暖堪留醉楊
柳城寒詎縮愁教市到關驚姓字邊人迎轍記春秋天山

更待磨崖筆定遠如何便浪投

念歸

念歸歸未果無計不遷延行日憎頻改離觴笑悞傳河愁
過衛凍寒較入燕偏故國逢殘臘關心記往年

冬夜盧虹仲陶路叔張大木集寓中兼懷張伯寅徐
象一分得浮字

虛堂一笑足相留旋簇明燈典做裘歸雁各天今昔夢啼
鳥殘夜淺深愁城頭寒角吹霜落禁裏昏鐘帶月流不藉
糟丘能永日金門何計免沉浮

秋日草橋讌集

補註帝京景物畧曰右安門外南十里草橋方十里皆泉會橋下伏流十

里道玉泉以出
四十里達於潞

春期慙屢負秋爽始同尋出郭村非遠穿林逕即溪岸蘆

蒙水白堤柳上橋陰不是無車馬郊行各會心

補註此公
草橋謔集

詩也后仍有草橋秋集五言律二首景物畧合而為一
時此係第一而慙屢負慙作經始同尋始作得不是無
車馬郊行各會心作豈必藏丘壑溪流已會心載草橋
秋集第二首蒹葭林圍屋為第二而改側樹籬陰合迎
溪殘雨香一聯作結束登臨具一首因落句有未論
丘與壑出郭已多情故將此豈必藏丘壑亦改也

冬夜岳季有李長叔馮羽明鍾伯敬陶路叔沈虎臣

招集韓求仲寓中言別

相逢頻念別今果問歸程縱喜親鄉國其如隔友生
煖杯寬襟緒高論寄餘情聚散尋常迹茲晨較不輕

過上谷謁楊忠愍公祠

浩氣千秋植孤衷九廟臨猖狂空吏議戮辱豈君心暮日
寒松晚祠春勁草深漢廷餘斷檻趨走激冠簪

再過黃梁夢

靈構倚高原瞻睇嘅心素中有投枕人栩栩未經寤詎謂
四十年爨下止旦暮反覺仙齡駛不及流光駐情愛假蹇
驢悟者損其趣醒臥總非真尋真向何處簷霜僵樹列螿
雨陰苔聚擾擾夢中身輪蹄自來去

十月十三夜月

常時忻見月茲夕轉高寒薄霧昏猶織稀星白近殘砌空

愁久立檐缺更斜看斟酌呼杯酒孤懷不易懽

過鄴遊成皋王南園

葱鬱芊綿處風光別作鄰冰霜殘歲路丘壑暫時身
藤蔓屏旁壓松圍石俯親喜無金碧累窻戶可留人
經歲稀逢竹方時急問梅態從淇右借香憶隴頭開砌鶴
逢人避沙禽撲侶迴兔園仍賦筆易歇是銅臺

湯陰道中

候館行俱識輜車慣所經壑冰淤水脉阜石具山形雲沒
遙村白烟生野寺青有懷憐漸遠汎汎感流萍

臘月衛輝時以苦旱雩雪

愁心俄節序客鬢正蕭騷訪古丘陵改祈年郡國勞雪稀
陂麥短日淡野楊高脂藥煩恩澤逢時慶所遭

渡河

波濤千里目舟楫五方心浩蕩淪疆域空濛閱古今漲痕
沙刻浦煙影岸移林菱蔣悲農事秋霖嘆陸沉

過新鄭訪故相高文襄公寶謨樓鑒忠堂舊址因覩
其遺像樓及堂各有穆廟御書賜額仰瞻感述恭紀
短章

昭陵昔御宇植德邁軒燧文襄奮詞流穆穆鍾鏞器匪繇
丹青畫蚤獲舟楫利藻鏡有兼資風雷無凡施爲霖澤八

有謀告必遂灑落君臣間膠漆未堪譬鼎湖攀遺髯貽
謀頗淵秘執手玉帛時睿衷諒深寄功高寵辱身時遠異
同議斯人已山阿斯堂尙天地梁棟吐奎光宸章滿函笥
帝錫以嘉名揮毫出遊戲至今五色錯仍呵百靈避欬戲
念方今靈鎖九閭閉拱默固一心瘡痍漸多事治國在環
轉積誠未堪致造膝已渺茫鞠躬苦憔悴緬思遠步艱轉
覺前修異晨星半淪沒好音疇堪嗣展卷挹餘采豈泯典
聖義載咏破斧詩泚然雪予涕

襄城月夜

驛墻今夜月將奈旅人何疎樹無濃影晴階有細波微寒

孤映出虛響靜聞多若不關情事城砧並野歌

新正訪陳翁小飲

枯筇布衲謝招尋春到衡門曉夢深釀黍且開朝暮口
花猶繫雨暘心案頭饑蠹窮相弔林外寒鷺澁未吟人世
幾回新節物能留碩果在喬林

早發

樾馬嘶燈起郊扉帶霧關映星先辨水望樹稍分山倦入
遊情損寒將旅夢還兼程期漸近鄉思反難刪

行園

草閣春還至衡門蹟未荒近池殘竹活移徑幾花長雨壁

蟲留篆風牕鳥剩糧掃除催稚子菓熟許先嘗

人日泛舟唐河

溯沿無數里往復已多時藍尾兼鐳至黃頭綴網隨
拍煙堤柳過漱石水花吹寂寞前朝寺鐘聲午自遲

郊行

閉門常倦酒出郭稍關情野草幾時綠春風長日清
沙欹頻駭馬柳淺誤投鶯漸欲忘歸去空村坐晚晴

雨中同時良兄攜酒過張忠鼎拂鏡亭

路熟遊能慣人閒興偶同僧歸春草後鳥散雨聲中
竹石居無次煙嵐坐不空青郊紆白社客刺不煩通

春日訪李刺史園居

春郊晝雨華門閒剝啄何妨惱閉關松徑淺深爭泫霧林
煙濃淡各描山攀花落蕊憐春後倚樹看村想畫間清境
豈容私俗駕隔城亂炬蚤催還

補註此二首桐甫齋敘在過拂鏡亭集伯和王孫北

園一處則刺史自爲念先廉甫亦新野人可見

再集拂鏡亭

幽趣何曾竟晴光不可名弱楊村異色亂鳥樹同聲曲徑
邀孤往危橋戒耦行厭厭馮夜漏隔塢是巖程

飲劉廉甫茂才莊居

分日賓筵倦送迎閒人只合在柴荆條棗十畝閒閒意剝

東坡全集卷之九
東坡全集卷之九
九
棗西鄰纂纂情近水林塘晴欲濕映花籬壁夜堪明緩歸
不爲觥籌亂留看湍沙片月生

枳花

幾樹啼鶯映曉霞綠陰不斷接人家一時桃李渾飄盡却
放春風到枳花

集伯和王孫北園

麗苑花難老幽欄草易纖細歌常近怨密坐偶生嫌蜂墮
香尋髻鴻驚舞隔簾露臺催徙酌漸已度明蟾

清明展墓卽事

舊壠松濤裏新畬麥秀中涼暄風物異歌哭歲時同溪雨

魚承唾煙絲燕擇宮徘徊遠村外似有鹿裘翁

上巳訪孝標先生明霞館留酌

朋酒閒門暖鶯花勝日私如逢緱嶺上重記永和時隳劈
童臨帖厨羞客餉芝分題舊簷竹留醉不能辭

屢訂重來約來茲反不閒暫留寬社罰片語袪塵顏眠柳
風披醒飛花水逐還好春來有漸晚景薄寒間

午日小集一葉齋值雨

朋來多醉日况復是良辰讌接安流俗悲懽憶古人竄磯
蛙閣閣度水鳥鱗鱗試指輕容隙香絲臂縷新

埜邨早行

春晚宿田家夜木答吟嘯晴薰固暄妍晝雨復清峭槿籬
圍廢井苔垣剝荒廟埜色面面迎煙林日分召千林同一
色一樹或衆貌斷續有無中往往猜峰嶠雲霞錯畫屏佳
處意難料目境每貴遠所悅在霏妙從遠睇茲閒葱蒼倘
相肖

水閣落城

陸處非融宅玄藏豈蜀亭斲椽除惡竹駕礎破流萍岸艸
衣籬翠城陰壓浪青歸雲飛自懶時一抱疎櫺
不待浮家去差堪載酒過曉簾爭蔭柳夏塹稍宜荷燕雀
高難到鷗鳧狎漸多石磯仍齒齒何可禁漁篋

李乘六明府招傅惟肖曹啟秘兩同年集小園補註

送曹還里清湍碧艸句

係庚戌進士名燿者

偃蓋郊坰宵憚勞桂廊苔砌幾周遭花前翠幕移長簞竹
外青絲注小槽密樹障煙猜徑暝曲溪吞雨覺船高由來

蜀國弦聲冽蚤吐明珠照綵毫惟肖蜀人
即席成詩

桃葉歌

王家桃葉世所羨桃葉桃根兩爭豔千箱紈綺鬪蘇華描
寫新裝幾更變千金買一珠千珠裝一囊千闌陽燧不中
意後商殫力誇前商低頭摩娑時一弄主人隨處皆春陽
東方明星照象牀犀簪倒溜倭髻傍殘月恰與織眉長短

襦華袿裁秋霜中厨縷切鸞刀忙春旗翠淪鮮菱漿瞳矐
初日牕戶白滴粉塗朱試添飾念欲安髻心玉葉朱簾錯
青碧念欲壓鬢唇鳳鸞釵頭鴉膩額吳機蜀錦熨新髮烟
絲繡襪波紋圻藏鈎博局有餘適厭謝濃鬟取輕拭花叢
嬌鳥啼不聞沉沉午夢爲行雲倦來肌體憚周折蓮花新
帔沾斜曛金吾居何許馳道過東華珊瑚百步障翡翠七
香車麴塵襪風起媵侍嬌如花胡來諸老媪貢妍引媚承
齒牙青錢白鏹滿面擲一笑已滿中人家金吾一何愚嫁
女復嫁姑雕奩輦百兩甘作溝中趨金吾亦不愚主人片
語風霜俱但令朝夕保恩澤立教赤地回春蕪威稜炙手

鬼神避柔戲閨闈如狸奴時匿頭上冠忽屢腰下符至人
不敢嗔笑催侍女探流蘇阿姑問不識阿女顏微愉天街
何事急朝謁且傾琥珀澆矚瑜一日苦不足千載期爲歡
惟愁明燭盡不得照夜闌寧顧萬人唾要路誇高官但勿
復匿腰下符亦莫屢頭上冠君不見峩冠縮符朝視事日
暮黃金流水至

五月廿六夜泛舟城濠三面

靜夜花沾露新晴水抱城板橋身俯仰烟岸眼昏明睡鳥
綠枝妥驚魚負藻行江湖在園墅天欲快閒情

堞影危堪數人烟斷復連曲非遵浦漱喧已去郊廬樹隙

星搖水邨中火照田壘乾休遽返佳處品茶眠

登乾明寺藏經閣

尋窮郊路及禪關龍藏丹梯客共攀偶至頓償多日約漫
留聊證片時閒松聲襍雨全生瀑樹色黏雲稍帶山積潦
不愁歸騎險摩尼分照夜珠還

大水卽事 四首

白河一夜不知岸蜻蜓舞天垵鳴鶴堞樓望入高樹平萬
頃蒼茫接雲漢丁卒虛肩南畝鋤苦師坐繫城闌纜十家
水入九家破哭聲水聲夜相亂牀竈層層架屋齊餘粒何
由出糜爛老媪赤股抵死行稚子痴啼泥沒肝忍饑且復

投六親亭午爺娘暮星散涼風颼颼夕轉惡豐隆着鞭電
光燦嗚呼安得雄劍決浮雲仰視曦輪照長旦

今春麥熟大狼籍斗米上街無百錢秋稼如雲漲陂澤野
夫果腹歌豐年寧期屏翳太驕肆曾無三日瞻青天黑蜮
跳舞河伯喜坐令滄海成棗田波心秫稌類藻荇高岡直
與汚池連每愁燕雀墜泥底已看蛙黽升林顛市心水急
鼓柁入恍疑村落臨江堧貧兒露宿淚交血支吾那到秋
霜前已悲租賦無所出况論婚嫁難生全縱堪白紙報災
疹懸恩恐未舒眉燃嗚呼天王明聖政府厚終能調燮圓

重玄

生年習聞水兩至後者壬寅前癸巳老人八十雙耳聾歎
詫眼中無此事舊時野屋盡泥途幾處孤村但空地寡妻
獨客但悲號驛騎輜軒亦憔悴憑高四望白練迷遠道松
楸變荷芰日影乍出氣慘悽破棟頽垣照鱗次嚙石真將
砥柱翻負薪欲續宣房志人云南去有龍湫怒逼陽侯失
其利古來變化稱天飛小溪跼蹐果何意江湖冥冥波浪
潤龍乎龍乎胡不萬里風雷縱遊戲

城西俯瞰清濠流年時水涸惟空坵園林負岸稍幽曠蒼
藤青桂常修修落日兒童躡屩入春風賓客維梢遊詎知
漲發上籬柵孤亭直慮隨沈浮茅棟半壓石壁圯紫薇委

謝無人收初冬木藥樹猶短波漂雨打應難瘳馬鬃或恐
衛公誤犀牛不救西川愁歸來衣裳屢沾溼案頭亂帙疲
繙讐疾霆殷殷屋瓦裂誰能倚柱書不休吁嗟乎隻手何
由補天漏寒燈燄死蟲啾啾

送張太初令岑溪

補註縣志張聞性萬曆貢士爲岑溪令

愁詠張衡第二章却飛仙鳥向遐方露凝嶺樹秋先白雲
起蠻山晚易蒼解甲材官閒戰伐扣簾猿女說蠶桑炎花
瘴草俱生態莫爲彈琴不下堂

寄不磷於登封時傅令辟修嵩史

補註邢臺傅梅爲登封令修嵩志序

係萬曆四十年壬子十月

憶爾經春夢屢牽淹留寧獨爲殘篇瑤笙漫紀浮丘後金
檢須搜漢武前岸幘曉陰團竹翠含毫新潤上茶烟側身
不見三花隔支策何時了勝緣

聊園小集留別李乘六明府

揮手那能忘盍簪干旄暫肯駐空林欲知他日相思地重
警殘宵未去心臨路柳長憐折贈覆簷花老費招尋溪烟
沼月堪誰主猿鶴將無劇怨吟

七又田劉諸子招飲白水書院

雨後完牆少秋前病葉緜殘霞棲棘杪野水出蒲根禾稼
仍連郭牛羊各異邨成橋如有課暮雀不成喧

秋原

秋原堪獨往况復是新晴
草路波斜直烟墟色重輕
雲遲全戀樹日薄半銜城
幾處寒砧切柴門向暮情

李天啓明府招飲謝公巖

大堤纔一曲不信有烟林
過洞尋峯首懸泉到石心
危崖先落日倒樹冷朝陰
縱使喧絃管都疑物外音

路阻懸梯上昏勞秉燎來
鬼工非斧鑿蜂戶是樓臺
山態秋爭老溪聲晚漸哀
昔賢貌丘壑吾轉愧塵埃

九日黎素之招飲韓園

補註後韋公寺九日有鹿門
思舊歲句似指此令節他鄉

再則前在都秋日草橋謠
集及此也韓園似在襄陽

令節他鄉再今晨較減愁俗仍記荆楚酒不累江州複樹
能迂徑遙山肯入樓雨深催列炬沾溼也成遊

習池

日日說遊山糟丘不肯恕及茲風雨晨始獲戒遊具我僕
訴徑濡招搖方舟赴烟嵐互合離前峯莫知處盤岡既疲
險循陂復虞誤撼撼委田籜冥冥匝堤樹空巖寂無人老
烏欵如怒未及剔殘碑指顧已失曙孤燈分野屋斷燒蝕
樵路長踞謝諾逋似遭山靈妒晴朝易草草陰翳反延駐
探涉貴幽奇茲適愜予素鬼神亦多勞增飾文其故

江行

楊弁招赴習池舟中作

因雨耽江色尋山借水程溼雲前岸轉白霧一帆生舟近
纔能見林回望却平倚窓眺空濶秋傍蓼花清
烟黑藏漁路沙崩滅鷺洲遠峯猜出沒立浪闊沉浮小卧
過津樹微吟厭榜謳無勞觴筇督幽賞自堪酬

襄陽逢劉孟肩自越中歸

別爾昔何日逢予今好秋寒暄難盡吐眺覽暫相留櫻筍

江南味菰蒲楚北舟美茲君故土應不恨登樓

補註舊欵此詩在百

累后誤今移於襄陽詩內

題李無學孝廉夢溪漁隱卷

象笏猶傳業漁蓑早結緣瑟徵湘女夢書在米家船蟹蛤

烟中市萼菰雨後田鯨魚如可逐遮莫上青天
閉戶蒿三徑臨溪石數坻晴林歸飲犢春水沒馴鷺留客
聽泉久尋僧出寺遲却愁東觀籍難免北山移

聊園晚步

問病過隣舍乘閒葺舊籬牛知自歸路鳥亂欲栖時暮景
不堪駐孤懷誰與期畦丁報寒早催護隔年枝
掩關却深徑整履復柴門殘水到橋折孤亭依堞昏乾坤
爭朔氣廬井錯高原荏苒看如此寧容久灌園

喜李叔賓自順陽過訪同集張園賦

喜報擔簦至偏嫌倒屣遲駕能輕百里約已歷三時堤柳

冰前禿池花漲後移拂塵看舊榻試問老僧知
折麻先自快促膝更何如次第商新句浮沉說舊書冥心
飛伏外別緒死生餘今夜高齋燭頻燒覺未虛

再至蔓園看殘梅

如此園林裏寧能止一看驟驚他樹綠細較幾花殘夜久
烟無暝暄時雪不乾好懷翻作累攀折滿衣冠

惆悵詞

夫君深故情攬我雙羅袂伺者夾前後欲語中踟躕精爽
夙暗通何況同巾車心與山不判命與草不如浮雲自超
越隨風互滅沒欲行仍不行柰此地上月

補註浮雲四句
桐雨齋作陰雲

倚天影滅沒我
行柰此地上月

早春蔓園觀紅白梅

補註李刺
史念先園

十畝寒花照眼明却驚病骨到先輕
殘香半入釵頭壓老韻偏依石外生
墮蕊刺枝俱恨事淡烟孤月遞多情
幽尋車馬朝來滿祇恐桐關惱送迎

沙彌兒歌用李賀體

清童不肯梵天住跳浪人間染歌舞
攜得娃宮楊柳魂衝體吳粧舌燕語
埋頭麩藥一千場殘月不眠老暮怒紅絲
暗按芙蓉屏峽溜山泉皆倒聽西缶聲中
鴻落地踏錦剪香作新勢燻籠夜啼淚
真假倡兒睫底隔花罵琉璃大碗

碎僮奴鐵限重簾立霜下

百泉

路觸楊花陣船紆荇葉陰按奇酬夙契凌險愜孤尋
浮靜苔能幻溪涼竹使深市橋喧寂外別自領玄心

泠泠傳絕澗閃閃逗朝霞天倒千絲雨波空一境花
曝鱗窺戲鯉銜翼數歸鴉欲濯清虛魄寒溥獨試茶

軒窻宜向背竟日得從容水避村成曲山虧樹作峯
輕嵐雲欲滅湛月翠難封落落懷嵇阮寥寥冀尚逢

叢臺

赴歐陽
明府召

孤臺蒼莽麗譙連霸氣都消感慨年映壁亂林斜見水背

樓殘日暗生烟清時冠劍人難俠往代荆檜迹易傳漫道
爾家滌太守猶煩出郭問山泉

送徐象一年兄權木武林四十韻

嗟爾南征候方余北道時劍匣初對影蓬轉遽臨歧動是
經年隔難寬數日期離舟牽苻藻河館幕榴葵自昔陪英
雋唯君藉羽儀鵬寧終笑鸞虺豈不憐夔小技非全敵
並綦所殊才姓字試奏宛墳笮樂競傾車胤遊從狎漸離
壁花搖翠幘郊樹隱烏皮楸局輸還喜檀痕指暗知橫參
占恨短刻羽和嫌遲直賈呼梟捷無妨莖馬俚玄襟宗晉

遠法物辨秦貽有勝恒相問何歡不共追禽魚中散地風
雨右軍池醉裏腸堪剖歌餘髮偶支川原憎散合今昔憶
參差異地猶拈謔來緘半扣詩幾能酬白墮那忍唱青驪
此去皆山水何人互酒碁亭林冷逋客墓草掩妖姬螺髻
隨昏旦虹梁陟逶迤時時絲管出事事綺羅宜最怕籠紗
帽貪聞手曲卮名區添墨本新茗沁詩脾潮接錢塘怒苔
兼宋寢移按圖凌碧嶂分日醉清漪累劫仙宮福風流後
進師冰霜經愈稔竹木筴無遺鳧雁休衙侶麒麟繞膝兒
積薪吾漸嬾伐木子應思齒頰捫常漏篇章托浪疑封狐
仍跋扈巢燕轉襪褫交道今如土離言藹若芝論心關嘯

語回首錯歡悲司馬文無似朱生畫絕痴晨星跂相望空

夢繞湖湄

時同門止子及朱敬韜在都

訪王長孺於極樂寺同用雲字

勝地初援愜所聞况逢琴酒慰離群書連芸草三車滿室
近蓮花一笏分遠水影移銜岸日亂林陰閣度山雲輪蹄
轉眼人間境涼月空檐欲妬君

朱敬韜齋頭同任明馨觀李畫趙字

高天日沸搏紅鑪赤脚却走尋精廬筆牀茗竈仍唾孟朱
生丈室如冰壺任郎靜者長雙趺掉頭指顧招僮奴摩娑
敗繭意態迂古香翠色交模糊蘭亭之榻桃源圖中有一

紙色更枯龍眠運筆神
睢盱渥洼波圻天閑孤驂
駟滅沒勢可呼其神其骨
兼其膚遠觀欲舞近欲趨
纖蹄絲鬣量肥癯任生任
生真類爾家東海老釣徒
金鱗不撈撈珊瑚片幅明
月傾五都把玩何惜忘昏
瞶朱郎黯淡色不愉自抽
敗簾搜前厨宋室王孫家
菰蒲大揮小抹皆秦珠李
圖趙筆堪齊驅此圖此筆
飢可舖世間翰墨誠區區
吁嗟乎虎頭骨腐昭陵蕪
倒傾禹鼎收康瓠朱郎炯
炯雙方臚辨析每欲窮錙
銖任生別一作鼻觀亦不
麓我惟一榻萬卷俱嘔嚔
唾涕皆皇虞龍眠王孫古
不逾子攜就我飯苾芻我
當爲子歌嗚嗚古今神物
帝所需其星泣雨世非誣
不然

奪取直換趙家酷亦可千日娛飛觚何必使五丁百怪長
擲揄朱乎任乎拚肯無

漢宮

漢家宮殿望西山侍籞陰森散曉班禁樹日高金鎖合苑
花香老玉牀閒九天沙磔青冥外五夜衣冠想像間東偃
西平陵寢闕祠官霜露獨開顏

得陶路叔卽墨書却寄

懷人縹緲蜃樓孤閉閣書聲出畫圖香稻露中移步屨古
槐烟裏挂腰符山氓陋有齊風否海族甘如越郡無聖主
欲封須久借更分新履到方壺

答孫伯闇

補註孫時
爲武清令

金門落木冷羈棲肯折瑤華慰解攜夢裏山川成獨往醉
中池館記同題吟蟬隔葉風時斷老鶴褰花月向低爲報
雙筇秋更健定知翹首翠微西

送曹季鴻都護還鄖

燕山風落曉多塵黃菊將開別故人驛舍去隨鴻雁晚軍
城歸與鹿麋隣銜杯事事煩前箸推轂年年屬後薪倘過
鄴宮應弔古荒臺殘樹長青燐

草橋秋集同郭季昭張德純家時良賦

結束登臨具風光面面迎野溪殘雨入側樹早陰生梨棗

邨橋市雞豚近墅聲未論丘與垓出郭已多情補註日下舊聞止載

首一律首聯作白屋村村度青帘面面迎
頸聯作梨棗過橋色雞豚近市聲陰作涼

蒨鬱林園屋紆圃井帶場四時占雨法一卷種花方行炙

田奴誤聞歌牧豎狂官曹偏困我耕鑿愧山鄉補註景物畧載二首

第一首為春期經屢負無結束登臨具此首為第二頸
聯作側樹隰陰合迎溪殘雨香末聯作一官能困我耕

鑿已
山鄉

九月八日郭季昭招集韋公寺同楊欽甫劉善夫周

則和曹啟秘家時良賦

欲試長房屐言尋惠遠池地幽忘遠涉節勝許先期野竹

分墻占長松帶蘚垂僧厨欣暫飽新供有霜葵

籬落荒能朴庭除爽白閒碧踈辭葉樹青削映波山砌冷

蟲多口天空鷺一還黃花虛採擷猶未破秋顏補註景物各載二首

一還作獨還

步徑身相倚憑高眼倍清寒蕪傳雨貌折荻戰秋聲檻外

非鄉國杯前此弟兄鹿門思昨歲遷代若為情補註謂前九日黎素

之招飲韓圃也

匪徒悲物候聊共洗塵容風斷空村杵烟流隔寺鐘驟寒

輕酒力微暝戀談鋒明日莫房老何能負短筇

送郭楊州出守

時才西省美無倫早向名都剖瑞麟腐草不迷千里色枯

楊曾見六朝人
窻姝窺閣誇青鬢
江賈填街拜錦茵
遙想郡齋雙鶴靜
遊仙新句轉清真

送張九劬司餉

朝霜感倦人握手
臨長川丈夫輕出塞
自起驅肥犍悠悠
大旆風毛胸層裘穿重鎮
望辰極屹與吭背聯盈縮在儲
胥甄擇歸名賢國縉方
蘇荼民命亦枯管熱血沃寒鐙所
急非金錢之子素心儔
朗若琨瑤縣贈之宮井冰佩以雙
黃閑鍾情祝修途匪由離合間

金城草木衰雁聲哀
且厲落日孤烽高
往往見輕騎殘鬼
哭玄沙猶聞上功次
夜深拾斷鏃鹵獲勤鐫記
豈不耻雷

同腹滿不敢議時媒
跋扈驕未隕機槍
崇投醪固宜廣選
鋒乃爲鏡似聞志士悲
中夜枕戈涕且歌
無人蒼茫九
陵氣

送李長叔還楚

都門常送客未盡觸悲歡
祇怪關情別因知托契難
籬花銜雨溼汀草犯霜殘
那值蕭條候離筵得自寬
遙指秋江樂懸知幽賞同
斷梁漁送火孤嶼鳥占風
洗硯牽菰蔓垂竿截蕙叢
閒情饒品藻消息望郵筒

秋日禱詩

忽忽盾山人不知
火淺溪夜來過疎雨
寒色澄幽襟庭前

老榴樹瘦禿無嘉陰西麓雲霧間矯首見岑崆側想山中
人洞戶扃霜林幽石長奇骨暗泉流清音豈乏區中戀媿
彼頭上簪展轉歲尋暮預恐霜雪侵顧步已若枳五嶽終
何心

雞鳴長安陌車輪戛前後歛沓金張門紅塵蔽軒牖次第
入起居日盱饑腸守伺色虞偶馳含詞冀微剖臥畫千載
圖帖席不肯久寥寥執戟人所孰在琴酒科跣或及辰勦
睡已過酉貴者豈不貴皮骨日速朽賤者豈不賤悠哉柳
生肘

怨詩

明明合歡被裁以鴛鴦綺徒知騁豔色不知愛柔裏君心
若秋空陰霽無端擬同此飾鉛華往往與怒比讒多甘棄
擲房櫳鎖香芷牛女尙有時兔絲亦有藟賤妾獨何依長
從此生死

初日東墻隅照我窻前妝展鏡忽自休誰爲憐清光出門
寡所適還歸守空牀異茲流泪泉氣竭恩不忘莫畫連蜷
眉薄命多隄防人云生別離寧必天一方微誠託夢寐不
至虞徬徨

山陵襍咏

六首

京國何時到圖經向已聞地尊千嶂擁路匝萬松分絕澗

難邀日屑臺半宿雲尙嫌車馬累驚逝鹿麋羣

輦道理青草瑤壇銷碧蕪聲空嘶鐵馬飛尙遇金鳧山鬼
朝正聚靈妃警夜呼曾聞臨萬乘悲愴闕宮趨

祇訝前谿絕那知別逕逢塘紆泉墜小草覆石敬重樹古
無凡幹嵐生有怒峰漫思占地脉處處紫苔封

曲沼堪流照層軒亦駕虛葉聲雨殘後潭影月虧初藤皮
新巢鶻萍開不射魚白頭憐衛士指點說鑿輿

九龍池上嘗
駐蹕其地

遠勢侵窮塞蟠基捧上都神工經斧鑿禁木遠樵蘇劍楯
悲風入軒帷晚照孤劔岬堪試墨不敢署狂夫

疊瓦鴛鴦合危梁蟠螭懸望雲多五色采藥定千年列柏

溪虛寢香秔熟祀田因思燕鼎日兆宅在皇天

西山禱咏

四首

日飽登臨趣翻愁應接勞重遊知寺熟獨往踞峰高柿葉
留晴露松陰漲夕濤晚參鐘韻歇展轉愧方袍

盤磴昏方至看山曉益佳谷晴雲滿戶陰密樹緣厓客夢

前林磬樵歸獨逕柴終思修白業送老一青鞋

香山寺

金地停車問香臺結伴登井厨泉自落棟宇石俱層題竹

沾新粉舉荷折脆稜含情追往歲名署壁間曾

碧雲寺

到此諸峰伏隨人一水喧磯平苔借面溪窄柳通根皎月

流輝並閒雲照影翻菰蒲覆深曲路盡不知源

望湖亭

送劉四之大梁倉官

別酒呼還輟，欬歔百感俱。
兩年何事隔，明日此身孤。
秋水殘城郭，清霜點驛途。
故鄉歸總好，高會復能無。

狗世聊簪帶，沾恩亦斗升。
豈真資俯仰，莫復墮軒騰。
雀鼠參朝鼓，蛩螢語夜燈。
夷門逢故老，憑寄玉壺冰。

戲徐子卿納妾

橋成親挽七香車，荳蔻梢殘泣露初。
夢醒試披羅幌看較，他東郭美何如。

霧暝花房不易尋，博山香字熱同心。
啼鶯語燕渾難住，無復更深奏越吟。

斗帳歡濃百戲兼
燈花含笑撲星奩
但知京兆新能畫
不怕參軍舊有髯

署中初雪

飛霏漠漠鳳城遙
省署朝寒坐沈寥
映樹似連疎葉下
傍池仍襍晚花飄
風迴簾幕欹斜入
氣淺階除宛轉消
忽憶故山幽賞處
蹇驢岸幘過溪橋

伯敬入都亟柬問蜀中山水

三首

天旣生奇人奇趣非偶然
胡爲私所厚而使多奇緣
異哉鍾郎使適乃當西川
怪爾臆指靈如彼巖岫懸
巫山及峨眉曾否造其巔
何境可最勝何遊居其先
藏子臆嚟間定

非語可傳今來客長安塵土凋芳妍請用壁觀法追憶如
重還一峯消一日千峯消一年知子此番至不必輕辭燕
憶昔攀上約書來兩齟齬予亦屢戒裝逡巡負前語豈惟
牽凡情良悲少佳侶攀上我昔遊對君尙能譜草木旣芊
綿岩巒亦騫翥當其斗峭時神工抑鬼斧持以較蜀山八
九或吞吐欲痛讀子詩揣摩以稱舉此景居此邦某峰某
如許向客誇幽奇齒牙作杖屨未見子詩者其敢於予侮
文章與朋友廢一則兩病竟日苦冥搜不如佳士並始悟
池塘言寄托寔孤勝豈必弟與昆神合斯聲應別君幾二
年磨甄未成鏡出入鮮所歡含情欲誰佞展卷原舊知反

若交新定乃知向者淺桃李下成逕盆梅未著花枯柳翻
老勁肯來飯黃精篝燈寫清聖慎勿及合離恐反襍幽聽
但挽錦江波澆我俗情性

寄允寰胡老師憲使

梅花春動點旌門鈴閣新開節制尊埃遠暮煙沈岫影磧
平融雪長溪痕金繒自古勞西北貂錦尋常及子孫爲想
胡牀清嘯暇誰因奇字獨攜樽

丘長孺宅觀暖室梅花

夜深殘燭換春早曲房催隨意枝相對非時種並開韻穠
宜近枕香細欲沾杯誰道幽州苦江南信已迴

同荆伯鶚鍾伯敬丘毛伯謝耳伯時良兄無窮翠林
集十方菴

霽景衣先覺晴原望盡通
遠煙初柳半新水夕陽中
久坐心生滅前期客異同行
厨易供具笋蕨仰隣翁
宛在風光裏悠然水木間
屢尋沿岸寺稍見著城山
懺佛難除懶逢僧卽共閒
淹留無不可拚與暮鴉還

讀陳白雲集追贈

每讀君詩後令人愧藝林
祇憑殘缺字重想亂亡心
一飽生無恃千秋證必深
轉悲巖壑底幾許沒希音

送徐子卿左官楚幕

楚國舊多怨君行良苦辛時方讐古骨世乃繫奇人謗牘
羞終白立心託有因恐非輕玩俗似強爲娛親雪下江初
滿州寬荻未勻黃磯應數往赤壁果相隣靜夜升沉感他
鄉散合身所宜魚味美細嚼對朱脣

集毛伯寓中得疎字

隣家楊柳映君廬點筆投瓊勝有餘談向幾人能恕放見
當隔日便成疎林邊晚照鴉翻盡巷曲春陰燕識初去任
醉醒饒自許難言朝市不清虛

從毛伯處讀朱求我年丈詩戲贈

弈聖不近枰歌聖不近拍造意旣已深斷非言語益朱郎

滄海君鬚作蝟毛磔聚散杯尊間倏然露肝膈嘗戲呼髯
公觀人觀其澤往往草與樹知爲山之液神明之所鍾將
子在如戟竭來讀子詩長離錯丹碧驚覲若新知幽鑿愧
平昔呼酒拂雞壇位子以前席夜闌岸危剋渺論吐金石
已甘退舍計欲贈繞朝策除俗并除理一惟子所適

除夕家兄宅守歲


年華來復去笑語弟同兄不必他鄉感都深此夜情居人
添歲帖侍女戒朝纓細把涓涓酒團團未可輕

送張書卿權闕江州

春酒初溫遊子顏離心閒緒轉相關偏能作客鶯花候况

復投身水石間九派徵輪隣建業六時坐卧有廬山誰言
吏牘金錢俗飛瀑聲中日往還

妙遠堂詩鈔卷之一 終



東越舊中日登獸

如通室詩集卷六 御坐借育温山

妙遠堂詩鈔卷之二

桐雨齋艸

于役吳關別時良兄

朝昏兄與弟相視只尋常不謂有今日況堪俱異鄉未能
一形影何以理肝腸往歲辭家際愁來較可當

毋還頻我囑兄在可而依彼緒已難遣此行仍未歸夢攪
南北亂心引合離飛忍見雙旌外蕭蕭日影微

夙遊吳越路風物意偏親縱美重經地難堪獨往身十年
城郭舊五月芟荷新更拔桐鄉泪憑誰兩地陳

也說經年晤經年可易云無論寒暖隔先已見聞分作頌

酬申伯當杯覓卯君郵書將候雁時望洞庭雲

白溝道中同孟和作

三宿征途裏今朝乃賦詩別愁殘爾後遊興始於斯蛙怒
爭喧艸蟬新未擇枝腰鎌麥秋日吾亦憶東菑

樹溼餘涼在煙開晚翠流偶隨村改路稍見水能舟戰伐
誰堪問軒車苦未休客旌引初月炎暑不須讐

過任丘賈貞復年兄招飲衙齋同杜閣伯

時賈
請告

知爾堅歸思懸期定一過晤非殘夜許愁柰異時何廨宇
去人遠田園入語多頓忘行役倦且止對明河

意外聯新好杯前快夙聞看君若秋水閱世以浮雲花暝

生煙態苦新疊雨文暫逢還驟別何異久離羣

五月次阜城鄉人石少府招泛東陂

作客都將節敘輕他鄉賓主故鄉情坐來空濶翻疑野如
此漣漪不出城初月暝雲爭作態淺蒲溪柳各能聲長安
朋好寬相憶傲殺蘭舟盡日行

新月

人似乍逢還斂態客如久別反含悽偶窺野水能先見纔
出疎煙已欲低

歷盡窮陰非快夕望來纖影恰新晴難期他地光相似亦
覺前朝雨有情

炎天輿馬方無緒涼夜池臺漸有思
筭到此番重晦夕或
當前路欲殘時

晚行

晚途全恃月煙未肯分明野戍呼還語
遙燈送若迎川原
濃一氣草木靜多聲殘夢清涼裏
喧聞始近城

欲登泰山不果遙有此寄

每每登臨處隨緣與趣成亦非艱遠道
不易踐初盟獨往
懷高士借尋媿友生日思連海色
松憶帶秦聲勝事何妨
晚愆期亦太輕仍歸前想像負却此
經行必有重來約斯
留不盡情練光真似馬先爲到吳城

過平原

東方曼倩故里

草草難輕去因君姓氏存朝廷一囊粟香火數家村人但
傳詠語仙寧有鈍根夏侯自知已碑斷與誰論

月下聞簫

難堪中夜月況有月中音非意清相送無愁聽亦深低將
和墜露殘已過前林耿耿遙天末餘輝寄此心

登嶧

名山與良友皆我性中事往往檢圖經早已結遐契有如
懷佳人聽客語手致其間微密情斷非語可至我既慕斯
山唯恐不淵邃夷者恕其姿險者賞其銳於凡覽涉時勞

此獻酬意浩浩風濤聲胸中自奔肆

天地有文章山川是其迹胡爲靈幻理亦不多珍惜一石
具一態一峯綴千石伊誰秉椎鑿經營費精魄工哉煙與
嵐淺深設青碧我思洞中居日月在其隙必有別虛空不
與人世隔譬諸此洞外遙望止蒼壁

空山日無人風石自吞吐此外絕聲聞時時拉雲語雲夕
亦安之暫飛復還顧客來坐盤陀似爲雲所拒羣籟發空
青悠然到心腑四隅遠人境耳目卽能古可見遊覽者根
株各爲取不少住山人此山未曾覩

絕澗既渺沔前峯復突兀野人習山輿攀援才一髮轉怪

秦帝車何由升翠律懸指絃古桐原野近消歇豈必奏朱
徽清泉盡琴瑟我趣與景會筆滿不敢述真畏此山靈龐
顏而蒼骨李斯固小兒宣尼眼中物

過彭城盧虹仲倉曹招登雲龍山

地果如茲勝山非易得名煙中河漸小天外嶺難平曲折
纔過寺高深盡俯城鶴飛今不返林麓厭雅聲

舟月

驛途亦對月終未及舟中牕戶非無似煙波較不同幾會
山有夜漸覺岸如空動息看行旅孤光各短蓬

舟晚

偶從林外宿遂對雨餘天殘日行空水孤村在晚煙葉光
新沐樹岸響乍停船鷗鷺關幽思依依客路前

野眺

孤蓬一以眺落日半高原湖白煙爲岸村疎水映門魚蝦
舟子業菱稻野人餐卽此關遊覽羈愁未暇論

泛高郵湖歌

河水潮水一線隔未到湖中湖爲客南風吹船船不行却
與此湖生此情沿堤小艇深深去菱葉秧針綠無數劃波
葭葦縱復橫豈辨前溪是初路漁家乘暮載網行漸看忽
沒空明處興殘艤棹河之濱林聲颯颯如有人酒盃角枕

盡無色但覺煙水來相親我將卜居向煙水所食話言有如此

贈劉爾利茂才爾利參藩劉公孫也

漫從鄴下數應徐海岱雄風果不虛蘭帖自傳梁上法竹
文新校家中書鈞簾夏木分題後□□□□□□□□□□
殊才須秘閣豈因同姓始軒渠

此首原在卷一李乘六明府
招集之上偶失今補于此

金山

龍藏開中阜蛟宮掩片陰岸將峯向背波挾樹浮沉潮至
全低石雲飛不赴林舟航開水遞鐘磬答江音月滿天難

辨泉深地可尋從來資國險寧獨領禪心

焦山

寺疊龍從裏濤飛菴菴間地猶空四望名果配三山海近
雲陰幻潮平樹影閒窺燈來水怪狎浪集口蠻隱逸波難
逝文章薜易斑焦先今不見想像鶴飛還

北固山

路接金繩遠根蟠鐵甕尊藤蘿廊曲覆竹栢領相援江雪
花開落山雲郭吐吞岫巒天作障煙火寺成邨問法三生
見看題六代存真形圖可就欲並十洲論

雨泊

客行三日雨豈敢怨前途林影深難測山痕遠若無蒼蒼
對雲水歷歷響菰蒲着眼邗溝勝孤舟亦未孤

夜發揚子喜晤張治生先生俞羨長汪遺民山民同

賦

爲有朝來約輕舟晚不停悲歡情互勞離合語難聽波影
從星白林煙逆雨青十年何限意相對且沉冥

水光昏亦辨江氣暑能除境好堪分應情多不易書曳杖
何處鳥映火隔却漁更指潮頭月蒼涼夢醒初

蓼花和孟和

鄉心以花亂况復與舟迎尙未照秋水似多含暮情傍橋

猶細見背岸忽叢生旅泊知無定相思風露清

許孟鼎司理有事過吳夜追至虎丘留飲

故人與勝地豈易偶相同殘夜多情事他鄉不意中秋生
千樹語月到一池空莫刻蓮花漏胥潮咫尺通

望惠山

客舟乘漲急又失此山緣幽勝閒能說林原望不前峯晴
時換影岸靜遠流煙却笑維揚泊先撰第五泉

借竹軒與孟和看月

幽心何所着每與月相關此夜似初對前時知未閒光應
添遠水煙已半前山吟苦能忘暑搢頤竹露間

趙郎歌

曲在美人曲無主不然只如對歌譜誰將秋水雕刻成拂
衣歛袖俱有聲宛轉低回作悲喜一片妖魂酒間死淒風
苦雨弔燈光反魂不用尋名香坐中先有斷腸者明日見
郎翻道假芙蓉隔浦不敢言爲誰悲怨爲誰恩

憲副馮元成先生將赴武陵之命移尊見招卽席賦
別

木蘭尊酒共追攀便向秋江照別顏愧我姓名鞭弭後置
君骨相鼎彝間茶鎗載去斟湘水墨副攜將授西山清興
固饒張樂地前溪爭似白家蠻

遊情宦况兩蕭疎身類閒雲自卷舒喜有秦人歸版籍全
將騷語治文書嶽僧寄橘洲堪種侍史吹蘭晚不如大纛
高牙爭滿路偏令絳灌惜吹噓

寄調孟和廣陵二絕

秋半看山取次行看花一倍有心情看山宜遠花宜近和
霧和煙較不明

須擇幽奇安手眼正愁豔麗損風神尋常衰草迷樓地真
解關情有幾人

喜丘毛伯至同賦

補注桐雨齋
無中一首

依然共杯酒數月別來心始覺經過味翻因聚散溪語多

山水理問得友朋音細刻官曹燭清言共苦吟
旅懷饒病緒倒屣便相寬使我神能王酬君語倍難悟陰
溪揜映竹響競高寒漁火江橋路還邀殘夜看
幾許登臨趣問之秋水濱好山今有王初菊亦留人是勝
必孤往所懷須細陳品茶兼選石驅遣作閒身

自題桐雨齋和毛伯韻

不雨陰先溼因秋影漸寒賴君堪作侶多我尚稱官煙後
高枝重霜前墮葉殘所饒疎遠意竟日許閒看

毛伯夜至看劇同飲

汀浦沙寒蘆荻陰不妨相憶卽相尋客隨殘夜舟來去人

女史生言金
共高秋氣淺深麗事固防摧病骨曼聲偏易引文心垂燈
却話燕中舊斷遂疎鐘與夢沉

送郭伏生游潛江

獨往尤宜別稍遲暫攜古調傍新知舟車一月秋溪路橙
橘千山日暮時白勝易投沿岸酒烏絲閒寫渡河詩也聞
安邑豬肝賤莫道無依客况悲

舟次招集丘毛伯陳上之沈虎臣商孟和分得蕭字
山意秋容手倦描况逢名勝坐相招煙蘿影裏殘高燭水
木聲中過短簫坐近危談還浪語觴行舊譜復新條醉醒
偏記分行處十里霜楓照野橋

寄懷錢仲舉先生

南國身空寄西江，眼自懸班荆。思往日把菊，又秋天煙冷。
孤琴裏霜飄暮角，邊安昌今後宅，誰可繼彭宣。

漫道微輪拙，偏宜眺覽新。長閒安地僻，少累喜官貧。徒石
疏齋牖焚香，對待人筆牀。供柿葉還許著書頻。

吏牘朝全減，幽懷暇漸增。訟堦簾一軸，官閣飯三升。寒月
添衣待荒臺，挈印登匡廬。雖較遠攜譜，寄詢僧。

梳熟應先醉，棠新若共攀。絃中康樂水，屏上仲初山。落木
邊吳下，寒潮撼越還。感知兼念舊，阻絕轉相關。

九日同錢受之沈虎臣秦京商孟和登高上方

何時山不可到此必今時獨以地能遠易爲秋所悲水寒
峯影定霜繁葉聲知隨意微鄉土舟航百戲爲
所貴吳山勝無山不見湖時將殘橘柚地已半菰蘆巒壑
青相帶雲天白漸無持螯雖樂事搔首屢躊躇

秋日寄懷時良兄

長洲苑外北鴻稀坐聽砧聲想授衣兩地起居書半準各
天物紋眼頻非空江落木驚寒早斜日遙山送影微惆悵
對牀前度月劇談高譙與心違

帝城賓客易參差臥對丹楓重所思茗酒可經曾賞地亭
林空想獨尋時江花霜作飄零候禁樹天留揜映枝誰見

病餘懷緒惡登山臨水日低垂

焦定夫倉曹招飲署中池亭

官舍郊居到不知看君巖壑在鬢眉階連水氣朝全冷
亭匿林陰夏稍遲秭梳薦蔬非別地聽松題石又多時
淹留拚趁兼程月去任幽情任所宜

寄楊脩齡柱史

誰堪嶽嶽上楓宸怒隼飛鵬迴絕倫自昔物情推快士於
今正氣屬才人朱衣仗底憂時泪紫橐函中博古身
官府漸移非往日可容緩徙漢家薪

閣鈴聲細畫清幽勝賞還憑攬轡留沅芷澧蘭聊贈答秦

碑漢版日冥搜題成諫草雲將夕撚斷吟髭葉盡秋爲問
錦帆東去逕何時雙槳並追遊

簡虎臣

以我日無緒多君時見尋苦吟禪小果痛飲吏長林鬱鬱
竟何事悠悠同此心請看稻梁候洲渚有饑禽

井邑寒波上階除落葉餘雨令山約改霜遣月情疎鹿聚
談遺沼蟬乾補舊書語狂曾有禁相問比何如

舟次維揚集顧小侯所建宅分得寒字

詞場片語卽新歡客思因君亦暫寬夢裏鶯花隋社稷尊
前賓王晉衣冠微煙半挾江風溼殘雨猶吹樹影寒不爲

晚潮催進艇，蕃釐遺種欲求看。

寄長安同社諸子

人生山水及交游，散合關情可自由。
舊事偶追如共語，佳辰多負始深愁。
寒江映雨爭移暝，凍樹辭霜又改秋。
爲問慈恩詩酒地，幾人堪聽鳥相求。

春明一出果天涯，汗漫緘書望屢移。
看飽白雲那與贈，立空明月豈堪期。
衣冠雙闕聞鴉蚤，燈火三條散馬遲。
不道闔閭臺沼上，蕭條易作子山悲。

靈巖寺

爲館娃宮故址，有智積菩薩化像。

感慨千秋近躋攀，信宿多亂杉籬市。
曲寒日翳巖阿寶地。

會香粉金鋪竟薛蘿覆大峯四障馮閣水微波花隱殘鐘
坼蓮生斷礎訛神僧自梁代野老尙吳歌塔敗狐頻聚臺
空鹿易過豪華與空幻將奈有情何

響屨廊

昔人寵姝麗於此試盈盈碧草似多色寒泉那敢聲沙平
蟲篆滿岩黑鬼燐生豈有遺釵珥循行空復情

孟和盛譽其姬人畫蘭之妙謔之以詩

墨池香浸洗殘脂煙水湘南別有姿作葉似花都已了含
情多在點心時

弱腕淋漓墨未乾漳華九畹怯朝寒雙枝並蒂圖俱好莫

寫閩山荔子酸

送鍾五居易之白下其兄伯敬已先至

虎阜匡廬悉署名每因玄賞見幽情
置身煙水談多韻落腕峯泉墨有聲
自是勝情輕作客况於歸路喜從兄
相期易有重尋約不敢臨歧說楚行

讌雪

不見今宵雪那成此歲冬
昏煙翻有色枯樹若爲容
水淨明分岸山同側辨峯細聞知韻潔
疊墜覺花重漁舫深疑壓邨燈白未封
江橋鐘欲曉還復唱憐儂

送顧所建代太夫人供香天竺

香燈自切承歡志
文酒兼深覽勝情
雪後溪橋疑轉換
雲中瓢笠有將迎
短衣殘石樹千經
疎磬隔林春一聲
自是璧人爭看殺
豈須仍借蔡邕名

癸丑吳闕同王季高守歲各賦二首

流光冉冉復經新
髣几辛盤倍可親
誰遣官曹隣估客
我從君里喚鄉人
江雲欲改山前影
岸草偷歸雪裏春
最好笑歌殘燭下餘
酣能中兩年身

補注季高吳人
今卜居吾里

齋中竹樹同深夜
闕下芙蓉想舊年
對友忽驚談壽母
憶兄相問起朝天
歲時骨月纔知別
湖海交遊幾受憐
不用椒花隨往例
茶鐺添火試新泉

春日集閩陽樓

寄情一以曠所見悉蒼然月白知峯半雲昏在鳥先誰乘
朝爽至我欲夜深眠勿使高樓色青山私自憐

范長倩學憲招陪楊脩齡柱史探梅天屏二首

易戒遊人具難逢法吏閒乍青殘凍水淺碧蚤春山雲躡
經行處天親曠望間窮幽舖自可豈忍作程還

豈必梅真發空香入想新停杯澆石傲屏騎兔花嗅席稍
三商改厨疑六甲陳較量搜勝跡巾拂也嶙峋

長倩招同脩齡柱史董玄宰太史集一雲山樓

纔停鳩杖即鳴夷傑閣焚香送六時新曲教兒成粉黛名

山供客比尊彝雲栖檜栝昏先入雪盡靡蕪綠漸移賸有
藏書邀柱史接離空詫習家池

答友人問看梅之期

夙約諾何易同人來匪難經營纔有待牽阻遂多端花復
幾時好雨兼前夜寒可知幽勝事大抵不宜官

鄧尉觀梅次客韻

裊雨遲雙屐尋山遍萬株色香拈不似耳目到堪殊匝野
都圍嶺連村欲過湖周觀枝四照近覆影全無割地俱成
圃穿林豈辨途先春能避蝶非月誤驚烏煙暝翻籠白霞
生乃傳朱衣還裁羽士額或點粧妹傍石欹爲態和冰映

作膚網縷吹破萼飄蕩舞辭柎縱遣神娟秀終存格老枯
遠爲千里信香可一瓶娛便想移家入逋翁肯見呼

寄謝在杭水部河上

懷人雲樹渺江東一札三年未可通墨氣想流春草後爐
薰知坐水聲中河經太史書堪續署並何郎字喜同衣帶
到吳原不遠估船無賴望郵筒

放舟

閉門無二月倚棹卽千峯碧草沿溪面天青在水容腥風
過魚網斜日聞邨春言念同懷子攀芳未可從

喜晤王永啓時將卜居武林

妙選堂詩金
難卽詳離况仍同慰舊顏且依三竺任如是六朝還貧與
生相守身隨到卽聞寒江煙草亂無緒去留間

苔園訪范東生

知爾逢迎簡將予剝啄疑閉門不芟草入宅乃臨池羣動
于焉曠孤衷聊以披古人尊大隱近市勿言卑

小坐領幽色高齋佳晚天花顏俯杯杓僮指帶丹鉛問石
冷迎雨亂桐疎借煙遠遊有奇助言下特冷然

二月十三日過夏氏園見殘梅賦

花朝花未發不謂有殘梅水潤能忘暮風微未肯催恐於
今夜減悔已後時來誰惜銅坑路香泥屐齒回

園林何遠近興至卽相宜石具無人態花留未子枝禽魚
皆勝友茶笋漸佳時不是前曾到春工變豈知

送秦京讀禮還汝南

過越書難訊經吳歲復新江山重見日草土獨歸身烏怨
偏驚夜鶯歌亦慘春加餐扶死孝不暇念途貧
仍倒相迎屣難維欲去舟有情寧免恨何語敢云留短劍
防千里空衣哭九幽南陔曾許賦奈汝廢詩愁

觀童子作劇卽席同俞羨長限十八韻

伎筵更短跋詞侶罷高談似玉聲爭戛爲花蕊尙含舞場
嬌獨騁歌譜慧曾諳屏轉初迴袖奩開仁正簪斷腸何容

早流盼幾人貪掌燕無時任啼鶯不敢參陽春非郢上子
夜却江南態巧悲愉轉身輕進止堪攀先愁柳弱分宵及
桃甘漫使魚稱婢宜呼后作男變搜宮按九調遣叠成三
翠黛描山臙紅潮上酒酣韻清聽豈悞觀久坐如愁映水
裙波皺移燈髮影毳泣前吾未忍破老爾應耽僮豎塵須
遠妖姬見亦慙蓮心將共剖鶴背可勝擔莫便收羅薦還
香欲往探

和范長倩觀國華諸歌童作劇二十首錄二

綺筵初徹繡屏開絕技應知有別才蝶粉鶯魂嬌作隊隨
風齊入舞場來

半面爲歡半作嗔，獨將澹冶出丰神。
絃繅調促應無暇，騰出斜波惹醉人。

上巳集夏園

園經看竹後，時紀浴蘭初。
郊市居相半，亭橋地不餘。
雨暄花更起，煙重柳難疎。
晚更臨堤笑，清狂被倘除。

薛直指招飲歸大學園

遊緒鄉愁不易揮，招尋籬落有騏驎。
留晴迭引花三月，割俗都憑水四圍。
障日松杉爭倒幘，犯霜蘿薜也鈞衣。
已看指點春星蚤，猶遣烏桕唱緩歸。

時良兄以使事過吳關喜賦

每作鄉書返懸期使節臨果爲今日事頓失兩年心細把
杯晨夕重逢客舊今向來艤棹地指顧一沾襟

江路非難達王程喜暫寬登臨須有擇酬應屢更端雨復
同溪聽春兼不遠闌奇遊輕萬里賦別也成歡

同張治生業師俞羨長沈虎臣戚不磷劉孟肩時良
兄登大石分得文字

幽探猿鳥共爲羣磴絕初看衆嶺分野老自燒新劇笋山
僧常袖欲歸雲晴邨草樹湖如帶陰壁藤蘿石有文師友
弟兄來不易憑欄爭語洞庭君

亂頭歌

與歐陽文忠公出丰輔錄

秦宮夜向花房宿曉起貪嬉倦粧束鴉盤羞作女兒鬢千
疊青煙納寒玉覆眉幾縷連髻梢猶隱殘紅在肌肉朝光
瞳矓漏聲顫簾隙乍開見人面背聞只作杜蘅香滿背縱
橫印成線此時披衣仍復留此時對鏡仍復休春江斑駁
草新長東風無力吹輕柔短袖倚屏沉香色手交頭俯俄
光澤犀簪一隻紅一絲萬片心魂騰不得

支硎曲

雨晴新水半槽通綠淨黃疎麥浪風東去洞簫西畫舫始
知春不在城中

一幅簾衣面幾層雕欄皓腕語斜凭天花陣裏尋常看輪

盡篙工與寺僧

趙家池上滿蹄輪懷刺腰輿日幾巡几席杯杵分款出任

山忙比上山人

麗日酣人結隊宜奪將雙眼作琉璃昏歸朝出緣何事水
態山容總不知

虎臣過訪留之

散帙巡檐意總迷逢君又遣葛巾低淪將碧斝千旗露踏
過青鞋幾繡泥夜久鑪鑪如問答看多花木有歡啼亦知
郵舍鷓鴣意醉國同攀一樹栖

送王五亦房北遊二首

濁酒未成醉春山真獨征尙攜餘病往因見遠遊情
難看柳殘紅小摘櫻方言分地寫古蹟檢書行天馬羣終
邁家雞價肯平君歸我應去相送轉淒清

漕水吳東接皇居魏北隣聊因報知己以此異遊人微醉
落花見苦吟孤燭親鬻琴寧待賞聞筑可沾巾衣履江山
氣車輿歲月身試憑詢少婦怨別且甘貧

雨霽

梅雨動經月茲晴見亦難朝暄不約返夏日有情看林靜
鶯聲出花深蝶路安浮雲尙來往疑信乃多端

荆伯鶚以補官如京師賦此寄之時予兄弟皆出都

三山桃李未全孤日引離心憶上都文字左官原定理酒
人失侶是窮途宮鶯曉唱停車幔邱樹清陰閣睡壺試向
草堂過捧檄浣牖上食喜曾無

舟晚

每愛山宜晚兼逢雨乍晴殘陽如有約微暑自能清烏亂
他村影蟲聞幾岸聲煙林相起滅天水與歌平羣象蒼茫
改孤懷動止輕江橋歸易達吟望亦何情

將遊天池諸山始發關趨宿楓橋

晚景登林阜登臚試游衍近水生涼心託寄自不淺峯遠
山響微葉低露光泣初月破殘雲孤輝逗溪面有如耽遊

人久鬱未卽展泛光或圓碎遇物各幽顯談捷乍無倫境
深庶可選此行爲山役夢魂亦清洗

自西新橋捨舟命輿經歷邨落

維舟足偃仰改步方攀躋廣野無定風禾稼高復低一徑
入溪谷亂村臨斷溪雲陰黑峯嶂水氣腥菜藜偶逐負薪
子行逢饑坂妻覓眠有安翼蟬奮無停嘶寓日各多營勞
生誠可悽

由謝宴嶺抵賀九嶺歷修覺寺欽仄二十餘里皆行
山間

看山有佳候非暮必須晨辟人百年間老穉得其真午行

日氣盛峯翠溢難勻紆迴出蒙密徑轉目逾新不知際層
巔下視氣乃振白雲曳如縷隔嶺忽已親安得與之俱還
往遺其身

旦旦與山期觸暑怯乃已科跣方牀間翻愁坐成飀煙嵐
盪心目如雪澡膚理寒燠及陰晴錯出山具體夏殘葉聲
簌涼颼颼欲起閒情作忙事餘勇溢屐齒襍穢以尋山山
諒呼知已

天池山入寺

既踐山中峯乃造峯陰地空陂翳落葉微溜潛以滋稠巒
互向背怪石爭屢屨幽意見千古蒼波無四時其陽富瓊

玕斲產宜槍旗鳳鳳沈代年往往苔蘚欺樵柯響蒼紅鬼
火添琉璃巔峯名蓮花佛理或在茲

七夕望月

好月初秋滿孤舟獨夜看委波煙似閣過樹影能寬魚誤
浮將動鳧涼夢始安晶晶經暗浦了了數前巒闕寂生愁
易虛空着語難江天清露下漁火數星殘

過滁遊醉翁亭

詞人偶爾處千古賴爲名遊豈妨官事文能愜勝情浴煙
山屢折遜石澗微行獵鳥欣相得霜天共一清

往蹟難輕負閒身得快登到門黃一樹立壁翠千層碑作

山圖紀僧知水廢興環滁觀不謬煙彩日飛騰

木瀆過黃伯傳隱居

所居山水窟豈復患無隣野老過詢字家兒歸負薪窮吟
常竟日孤往或兼旬傲此蒿藜色栖栖空世人

入門翻類野四壁半雲封布席沾陰菌搜厨薦晚菘緝纒
仍少婦晒藥僅餘童簡率孚子意留連聞遠鐘

永城喜晤張伯寅王未疑二年丈留款

喜從周道及君廬迢遞山川信不虛格外主賓千石少意
中兄弟一燈初風微暖室仍留菊霜滑空園自剪蔬徙石
疏池分管領始知幽事屬家居

送商孟和之南都迎晤伯敬

又作行舟計頻令座榻虛長年看面熟小婦試啼初念我
非輕別籌君倘定居江山與賓客終恐不能疎

重遊寒山寺

右引

辛丑冬先人謫丞構李予兄弟同侍而南至姑蘇馮開
之先生同其倩沈生超羣招遊寒山予方總角亦與焉
癸丑予以司農使來則十三年而往矣先人既用早背
開之先生倏繼乘箕超羣英少亦復短折周覽風物不
勝今昔存歿之悲用賦短章聊寄深惋云爾

十三年過眼再到豈堪言尚記聞鐘岸依然向水門未湮

名勝蹟不返典型魂試問齋堂磬都如一旦昏

此日尊前客當時膝上星十圍楊已白千箇竹猶青觸意
途紆折關心淚醉醒晚晴堪徙倚軒楯畏重經

亦久貪來此凄其復自傷總看同逝水不可到斜陽野霧
臨橋暗寒山赴浦蒼倚檐卜棲鴿似促暮歸航

高堂醜酒處危壁記名無少鬼俱先輩殘僧或舊雜雲思
閒影迹楓意冷根株回首俄塵土何論往事徂

寄答鄒彥吉先生

大雅嗟零落如公復中興埋頭驅百代彈指悟三乘法蕩
通天海清寒出澗冰未須徵甲待堅欲避先登

門迴掛冠蚤波寬垂釣遲圖書新鳥跡經術舊臯比小海
傳門客靈光教侍兒不須遊汗漫竹素傲佺期

雨集限韻

五月一日同俞羨長戚不磷黃
伯傳范東生商孟和汪遺民作

纔堪試蒲酒豈足具蘭肴暇自深清課疎能恕素交高林
聞亂葉穉竹偃叢栢未改軒廊色幽情若遠郊

螺室草

上

方城道中寄兄時良二首

兩年辭故國三月到離亭復此出門去祇疑歸夢醒好春
催柳碧殘雨繪山青不獨河梁側沙寒感鵲鴿

醉辭當夜半無語遂分襟所識漸看少共愁追憶深荒城

今昔路短燭去留心總類孤飛雁霜秋遲好音

大風渡河

風勢催傾仄河源接混茫馬牛迷指顧蛟蜃狎衣裳蓮葉
操難穩桃花漲欲狂亂峯攬霧暝初日抱沙黃投璧終何
補乘槎亦近荒未須悲泛梗轉覺悟垂堂

新綠六韻追和俞羨長

紅樹餘殘映青郊半夕曛泛風如欲委照水忽難分陌軟
鶯堪醉籬香蝶共聞豪家將鬪酒遊女自低裙遶嶂連無
地疎煙着有紋不禁南浦外離緒日紛紛

過恒山周則和太守同魏啓之司李留飲

翠幄西郊記別時每逢垂柳卽相思
同人不減鴻聯字倦客真如鳥就枝
細草過車愁盡碾高松藏閣喜遙窺
無言名酒中山冽官燭頻更醉轉遲

王以珍明府招飲大悲閣其日上巳

補注以珍諱聘吾鄧人

有王能令客况輕却因節物使心驚
底須臨水方佳事誰肯登樓減曠情
雨淨斷虹分半野雲開千嶺到孤城
也知韻勝官難俗整暇看君在酒鐙

欒城道中遇雨

春與途輕盡朝兼雨作寒所憐羣動息
轉見獨征難村溼煙孤覆林疎響遞殘
高雲催暮景瞻望不能寬

送何盛符權河西關

暇即相尋到即歡如君那可出長安花溪野燕行相趨雨
澁宮鸞聽稍殘水市山梁憑作主酒鎗茶譜不妨官兩年
為別情非一并向青門去任難

夏日獨過十方菴

不貴前時約難於此日閒荷溪堪晚對蒲短得初刪僮挈
將烹水僧談所歷山觀心付澄曠一倍遠波間
方竹臨堤杖生蕉掛壁衣風痕斜浪歷煙力衆林微熱客
非真賞忙官必早歸暮涼悅魚鳥此意不應違

禮佛時予悼亡

遇勝翻航卧甘愁嬾問禪煙花情涕淚露火幻因緣浴鴨
破空水鳴蟬爭暮天不逢僧止宿歸路復悽然

初秋同丘毛伯再過十方菴得丘字

水竹難從近郭求上方重到卽新遊山過疎雨無心出花
忍輕寒有數留客興偶憑碁局隱僧機聊與箭鋒酬浮鷗
野鹿俱情性空向羈栖負一丘

河燈八韻同毛伯賦

忽訝微波上誰令萬炬連吹同陰火濕倒襟亂星懸犀照
無從避魚饞倘共燃風徐行似整岸曲到俄先觸蔣方明
滅隨萍亦遡沿定多驚鷺起應訝聚螢偏淵客分光織禪

宗續燼傳始知陽燄海端有夜舒蓮

題巖居高士圖贈徐象一水部

山水於人非泛親每從高士爲精神煙嵐所聚噴將洩手
腕欲停遭掣拽徐郎書畫工少年橫飛藻思傾都傳南國
一爲蒼水使西湖全結青峯緣爾來贈我巖居嶂半裂湖
山寫其上千溪萬壑收古人片石寸林取心匠清秋相訪
常杜門墨花每浣衣衫痕曠襟對客若無事新句問君都
不言興有所寄餘輒已知君獨任意如此歸來素壁懸障
看半夜嘈嘈奏宮徵

同長叔象一集毛伯齋頭分得巾字

昔別已知苦茲歡聊共申官閒無競僕主醉有醒賓山茗
香敲日隣花溼墮巾毋將杯底趣持語車中人

送沈虎臣落第南歸

青衫非異物放落一何頻不謂無他日難將語世人天其
安置子命定欲讐身索共蟬魚哭文章豈有神

送君何所說強爲美家山回憶三年恨重生一別間丈夫
恩怨淚文士死生關如此秋林色扁舟又獨還

寄范長倩

長橋楓葉照分舟又到丹霜碧水秋
棊几想因飛墨浣油
囊多以試茶留香雲溼地催歌板斜月當簾亂酒籌野鶴

女文言金
檻狷成阻絕可憐搖落念同遊

集長叔空齋

別互訂前期來仍厭後時曼聲勞客顧餘瀝許童私遠吹
秋難隱疎鐘夜屢移出門卽歸路未肯醉稱辭

秋日書懷

悲秋方及半秋思已無餘竹受雨先暝木知霜欲疎將何
酌薄祿又未果間居以此憶田里還山行讀書

慰王亦房下第

懷珠泣璞固難親莫向龍蛇問屈伸自是文心唾俗眼試
將物論閱途人寒城雁下霜司候廢廟鴉昏樹作隣爲客

有方須檢取苦吟醫病醉醫貧

同王季高孫君纒王亦房張大木遊極樂寺并窮郊

外之勝

掉頭來郭外暄寂自茲分稍取入林路遂逢歸嶺雲空原

存燒色淺草澁波文作意秋聲好憑高若有聞

補註景物
畧選前三

首掉頭作振衣畧
言去高梁橋三里

非因幽賞愜安得旅情降紆徑寺藏圃登樓山滿窓啼螿
難禁亂歸鳥間爲雙所貴神無累清酣傍佛幢

人歡好風日地復免塵沙南客愛臨水北僧難具茶石班

留曉露邨另接餘霞据撫看秋事農樵各有家

景物畧另
作側秋作

春

喜逢遊客少始趨幽人閒黃檗樹中樹青沈山半山心遲
孤月至袖挈亂煙還再到拚移襪聽鐘曉夢間

寄李季重倉曹於易州季重嘗令中鄉

補註季重字若訥爲子田

太史作碑

舊知潘令儼神仙不道馮郎尙未遷花映隣疆曾一色蓮
飛回舍却三年邊城斷角吹沙入官閣方牀聽水眠秀句
可商新釀熟尺書空恨阻遙天

報國寺閣秋望同王亦房諸子

鈴鐸蕭然定午風地高漸覺語虛空青螺巖綴層雲上丹

雉遙平一氣中寒谷豈真燕地異甘泉想卽漢郊同
疎黃掩映千林色歸路何由遠望通

景物畧綴作髻遙平作平
腰疎黃掩映作密飛疎綴

報國寺古松歌

徂徠一粒遺朝露倒插橫擎不知數
紕蟠直作益益觀斲折似遭鬼神怒
門前車馬日奔騰門內煙霜如未曾
靜眼閱將九朝物蒼皮留供百年僧
迺知凡物不能久必有神奇與相守
縱經宿雨上莓苔豈向斜暉競榆柳
別有兩株高撼風蕭疎瘦削羞將同
天昏合院舞虬浪夜報大夫參木公

極樂寺垂楊同亦房賦八韻

欲識依依恨難禁葉葉垂因風裁作縷裊露捲成帷腰饑
通宮軟眉低舊譜疑隋堤陰幾里漢館偃何枝只許斜陽
漏纔經細雨歛烏藏愁出沒垂字轉離披青女將霜候佳
人類病時願分龍鉉水長與濯妍姿

邨女歎

長松何陰陰女蘿亦靡靡貧家養好女名難出鄉里朱門
飾羔雁遺問妾容止盛年不相待牽絲向隣子低頭還所
遺一顧一心死越羅亦知輕秦珠亦知羨吞聲謝綺紈布
荆從此始

富家愁婚早貧家愁婚遲反反辭蒂花風急寧自知仰視

林間鳥大小雙追隨所天固貧賤各亦戀恩私爲怨旣無
端爲感非所宜去去勿復道持漿饁東陂

同王亦房過十方菴

屢至爲期慣茲來選境幽始知無勝侶未足侈佳遊水氣
寬浮夕雲容淺釀秋僧雜能漸狎代爲理觥籌

臨城千堞見遵路一橋通煙限空明外林參映帶中荷衰
湖骨瘦蔬熟寺年豐細向眠鳧語閒身我倘同

菴中讀張金銘詩有懷同亦房作

在城疲衣冠出城疲車騎斟酌遠近間北郭饒古寺高柳
匝澄湖幻出琉璃地稍至娛幽清周看滌煩滯對客數前

遊懷人托深致忽展篇章觀始驚歲月逝起立照寒波宛
然見肝肺昔來固偶爾重聚亦常事所悲期參差各苦迹
拘繫安保此三人果竟無同異懸擬君後思以我今懷譬
較畧我勝君再借素交至人生惟朋友各有針鋒契緬經
離後艱逾覺合非易不然長安中閱人如郵遞朝強作蟬
聯夕卧豈復記

螺室招亦房看盆菊同賦

董僕營秋課招人赴菊期偶然親北牖何必繞東籬舊露
能兼至初霜竟不知幽花同韻友疎冷倍相宜

九日同亦房諸子集魏園兼懷時良兄聞以是日發

里入都

撼撼倚窻樹卧聞風聲滿隔日訂清遊屐躍不容緩東隣
招歌兒西家借亭館入座無浮賓爲心倍蕭散隼厲始欲
高鷄陣有時斷遙林禿如僵細草寒逾短陰雨作幽態何
必貴妍暖醒各抱離憂醉仍悉衷款金門饒貴人鍵扉謝
徒伴同此對殘秋秋氣不能感人固各有營清忙勝濃懶
去年客吳門情以病癡累前年登吳山亦抱病餘思三載
解故國安能不憔悴同浮花下杯細檢意中事非謂無友
生所憐隔兄弟聞君裝有口使我減愁喟還因居者安遙
憐行者勩余積懷土悲君嘗出門意菊於幾處放酒對何

人醉應禱墮珥香定陳藏鈎戲獨念送騎喧或遜此園遠
霜雁難爲聽林楓立如醉矯首訴孤雲此懷諒不異

贈蕭爾先初度

不將煙壑換朝章酒律歌條日幾行秩左未妨循吏傳身
閒兼領少年場鄉心憶楚題鸚鵡仙族從秦識鳳凰歲歲
充間有往事落英禩並肉芝香莫待金門詢買人鬢氣隨
寒月
庭月寒如此披衣仍一行除將新水敵知禩暗霜行羣影
看俱瘦遙光積未平肯虛杯獨把忍聽杼雙鳴

燕燕詞

燕燕者雲中教坊女也色蕤殊絕某將軍見而嬖之挾
與宵遁寵冠曹偶將軍死大婦修郤復斥歸樂籍中燕
燕恒獨處槐里喬王孫飾車馬往迎姬婉謝焉亦以宋
於代藩故子與亦房憐而作詞

飛狐迤邐接雲中繚繞煙花上國同利戟長矛一百萬畫
閣瑇窻十二重中有一人字燕燕柳與柔香桃與豔十三
閉戶譜琵琶十五臨窻理筆研蹴陶鞋尖蓮倒飛彈碁指
下花爭戰愛學吳儂寬曳衣耻同燕女膩塗面君王麗日
陳歌舞獨著鸞鞞領樂部歸來阿母不敢催一睡紅窻日
亭午誰家俠少敢浪過縱是王孫肯輕許將軍手獵曼胡

纓纚得心挑已目成獨設柳營棲戲蝶別粧錦幄鎖流鶯
君王失姬母失女訪遍城中不敢語豈料春歸在綺羅只
言仙去爲雲雨窈窕高樓擬金屋畢媚搜妍歡不足小字
常臨勒石銘新聲偏習饒歌曲畫眉難施穿札巧弄乳還
疑點酥熟銀屏掩映疊猩紅金甲淋漓染螺絲朝朝暮暮
還如此不道飛丸捷於矢佳人縱將城國傾武夫不爲兒
女死朝遣着麻衣夕驅辭繡帷可憐滿梳雲憂憂并刀飛
可憐卽卽躅亂踰埋污泥賤妾含辛容致辭寧隨田父同
哺糜侯家白榜閣前逐王吏朱書門外追君王仍有姬阿
母仍有兒滿城仍有歌與舞賤妾踉蹌將何爲扶風豪士

金門客特遣飛書問消息
心許橋填烏鵲期
身憎檻折鴛鴦翼
從經朱瑟委塵埃
今日殷勤對使開
欲訴絲愁偏歷亂
強將心曲自徘徊
人生倚伏誠難定
爲君三聲斷猿應
將軍不敗由天幸
書生骨窮妾薄命

悲大安

□□草白陣雲黑
十萬控弦如鬼蜮
戍樓健兒枕柝眠
誰信黑甜夜臺側
收保援兵同日休
血波濺濺成溝流
就中懸竿是營帥
錦袍猶掛枯骸頭
河東笑城內哭烏鴉
飛啄人肉鴉飛人啼
臺柏青中丞奏捷如流星

孤山圍

機槍光芒烟火飛孤營一夜遭重圍韜戈偃矢不相向身
騎駝橐尋常歸織成紅錦蟠麒麟今日乃上□□身遊魂
夜抱馬鞍入轅門朝鼓仍振振問君肘後何綵綵凶門推
轂良有以安用散金買死士將軍金多自不死君不見□
□見像不敢射邳都區區文吏耳

聽竹

聽竹移未久蕭蕭幽事存縱令慳遠勢先已具孤根疎借
煙聯影寒宜月與魂石盟容我友任爾長兒孫

雪中簡亦房

不知夜半雪曉起一庭寒覆瓦較霜厚經枝如雨殘愁隨

初日盡思帶遠峯看倘子遲相訪餘尊猶未闌

冬日兩得荆伯鶚書却寄

次第霜鴻墮羽翰書頻翻遣思難寬狂令人怨猶嫌淺
趨身慵亦暫安曉徑得詩刪竹寫夜窻中酒刷冰殮巡檐
漸有梅迎笑已隔三年不共看

寄唁顧所建時有西河之戚

切雲桂樹喜初攀墮掌秦珠肯再還可怪嶽嶽偏意外不
令美好任人間無聊厭客談羸博有恨憑誰詛泰山丘壑
圖書憑健在莫令飛雪損朱顏

徐象一入山督石歸有詩見示衆體斐然因柬二首

如遠堂詩集
官事山中了遊踪病後勤樹陰深坐從澗響獨眠聞倚醉
招猿語闌題遺鹿分向來懷爾處彌望總寒雲

取暇經旬卧搜奇竟日吟孤懷超紙墨靜理出聲音瞑入
蒼羣嶽霜浮白半林于焉思和者定有夢相尋

答亦房并以留之

頻來真不厭欲去始成留
悉子羈栖味增余祿仕羞詩窮
違衆譽交泛省深求賴熟黃
醯道尊空未可憂

夢遠

朝起不得書夜夢與歡聚
晝短苦夜長且甘草眠去
夜夢與歡聚朝起仍望書
無聊翻卧簟恐入枕函居

初冬亦房諸子招同李長叔家時良集魏園看暖室

梅花同賦

車響纔停座語溫
歡深賓至未遑論
頻來真可呼家野
散立還如在野村
老樹臥惟留古貌
早花開不忍春恩
青鞋白舫湖山曲
細語前遊客斷魂

送王亦房之方城赴孫伯閣明府招

酒急悲歌換燭頻
游裝欲發且逡巡
名駒漫定曾看價
棄婦空存未嫁身
伯閣從闔中闔亦房卷薦居上會有所格不累
凍樹影愁煙不縮
荒河沙似雪初勻
遙知弦閣琴聲好
忍遣幽蘭怨晚春

補注

乙卯伯閣令武清荐亦房

送陶稚圭守大名

幾日琴樽隔唱酬
除書忽遣動離愁
官知近地差堪卧
人似殘年不可留
清茗苦香真佛子
高軒輕蓋古諸侯
君家荆牧非佳士
料理何煩到竹頭

夜招錢仲舉先生徐子卿楊修白二年丈暨家兄集

小齋六韻

竹溪穿徑僻星迴
爍窻明友集先王會
人間盡客情迹皆
經散合禮各簡將
迎勝地憑酣引高談
問譚生春猶嫌晚
至雪始自今晴未
罄三年緒無端欲
四更

立春次日雪東伯敬

十二月十九日
至廿三日

二日春猶淺千花晚競工餘寒知有待晨景不相同作態
斜吹濕無聲密映空蕭然吟歎處各在閉門中

亦房自方城施凝甫自光州至與鍾伯敬集螺室同

賦

消息簷前鵲啼聲不我欺後先曾共語遠近若爲期雪戀
樹高處寒生烟薄時縱還憐遠別亦已勝懸思

復雪

十二月
廿八日

果作今朝雪先爲半夕陰試霑仍不細因積遂能深燈火
他鄉暮田園儉歲心茫茫那暇理岸幘對遙岑

補註因積
能深學問

道德人情
思怨皆包

除夕憶左安人

強云擯舊恨情至忽無從舊歲茲宵共餘生何處逢人堪

幾哀樂鬼有夙音容無寐支愁眼寥寥及曙鐘

補註公於乙卯二月

別家安人歿于乙卯六月

妙遠堂詩鈔卷之二

終

上繪卷中首句是景不勝同前韻